

In Forum claustral cun musica classica

Roman Walker diregia igl orchester Luvratori orchestral Appenzell e solists

DA PAUL DUFF / ANR

■ **La gievgia vargada ei il Forum claustral sesplegaus sin ina nova moda en clastra a Mustér. Avon ina sala pleina ha pader Urban astgau beneventar ils musicists, solists ed il dirigent Roman Walker per quei Forum extraordinari.** Leu nua che corifeas dalla economia, da diversa scienza e politica refereschian sepresentan oz igl orchester Luvratori orchestral Appenzell, ils solists frater *Stefan Keusch*, *Dieter Hubov* e *Barbara Enz*. Els delecteschian ils presents cun musica da Johann Sebastian Bach, Wolfgang Amadeus Mozart e Josef Gabriel Rheinberger.

In viadi musical cun orgla e clarinetta

Il concert presenta in viadi sur treis epocas dalla historia musicala. Johann Sebastian Bach ei il pli impurtont cumponist dalla musica baroca. El ha sviluppau il sunar orgla cun sias cumposiziuns. La musica sacrala ha survegniu impuls extendi entras sias ovras. Igl organist Dieter Hubov ha sunau la fantasia en g-dur BWV 572. L'orgla electronica ei semusada sco instrument valent ed ha tunau oreifer en tuts registers. En siu temps da Salzburg – ed uss essan nus arrivai ell'epoca dalla classica – ha Mozart cumponiu numerusas ovras sacralas. El steva en survetsch digl uestg e lez ha giavischau enzatgei frestg durent la liturgia. Sia risposta ei la cumposiziun «Kirchensonate in C-Dur», KV 329 stada, la quala frater Stefan ha sunau sin l'orgla accompignaus digl orchester. Nies frater Stefan audan ils participonts a liturgias en clastra sunond l'orgla en baselgia, mo eis el leu sezuppaus davos igl instrument sin lautga. Igl ei stau per el ina nova situaziun da sunar sco solist avon in grond publicum en stretga vischinonza. Frater Stefan ha demussau sias habilitads a moda exemplarica culs tuns festivs da Mozart.

Cuntuond il viadi epocal suonda suenter la classica il temps dalla romantica. Josef Gabriel Rheinberger ei derivonts dil Principadi dil Liechtenstein. Entras sia mumma che vegneva da Mustér ha el giu bunas relaziuns cun la clastra. Siu concert d'orgla ed orchster ei resunaus dend in schatg dil stil musical romantic. L'orgla sepresenta zun exponida cun solis ed igl orchester s'adattescha agl



La solista Barbara Enz ha sunau cun gronda empatia la davos'ovra orchestrala da Mozart. Il concert da clarinetta en a-dur, KV 622. Al pult da dirigent stat Roman Walker.

MAD

instrument solistic cun bien sentiment. Hubov all'orgla demuossa sia capacitat cun sunar quella regina dils instruments.

La davos'ovra concertonta da Mozart

La davosa part dil concert ei puspei dedicata a Mozart. Walker ha eligiu in uncat denter las nundumbrevilas cumposiziuns dil cumponist da Vienna, il concert da clarinetta en A-dur, KV 622. Mozart ha scret sulet in concert per clarinetta. Ord la sempla declaronza che la clarinetta ei vegnida inventada igl onn 1788 sulet treis onns avon la cumposiziun. Anton Stadler, in amitg da Mozart, ha promoviu da construir igl instrument e retschiert dil cumponist siu concert. Mozart ha cheutras etabliu la posiziun dalla clarinetta ellas retschas dils instruments orchestrales. Cuort avon sia mort ha Mozart dau giu la cumposiziun. Ils tuns transcendentals laian imaginar il senti-

ment da cumiau. La solista Barbara Enz, ina giuvna da 22 onns, s'entaupa ella produziun cul scheni Mozart sil scalem mental sentimental e presenta l'ovra en tutta bellezza. Ella suna la clarinetta buca sco musicista professionala e quei procura egl auditori per smarvegl supplementar udend siu sunar.

Il dirigent Roman Walker, il rector dil gimnasi claustral, ha retschiert la plattafuorma dil Forum per demussar sia competenza el rom da ses studis da musica. Cugl orchester digl Appenzell ha el uniu buns sunadurs tier in'unitad. El ha promoviu giuvens musicists integrond els egl ensemble musical. Quella bial'incarica va maun en maun cun siu engaschament sco rector dalla scola claustrala nua ch'el promova e fuorma forzas giuvnas per lur avegnir professionala, las qualas fructificheschian la societad da nosssa tiara cun bunas qualificaziuns ed in spert cristian.